

Innarluutillit ukiuni qulini atuartussaaitaanerup saniatigut ilinniaqqinnissamut periarfissaasa annertusarsinnaajumallugit Naalakkersuisut pilersaarummik 2011-imi saqqummiussaqaqqullugit Inatsisartut aalajangiiffigisassaattut siunnersuut

pillugu

Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap

ISUMALIUTISSIHSUTAA

Siunnerssutip aappassaaneerneqarani tunniunneqartoq

Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaq kingullermik siunnersuummik suliarinninnermini ukuningga inuttaqarpoq:

Harald Bianco, Inuit Ataqtigiit

Debora Kleist, Inuit Ataqtigiit

Andreas Uldum, Demokraatit

Malik Berthelsen, Siumut

Knud Kristiansen, Atassut

Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaq UPA10-mi ulloq 4. maj siullermeerinerup kingorna siunnersuut misissorpaa.

Siunnersuutip imarisaa

Innarluutillit meeqqat atuarfianneereerneranni ilinniaqqinnissamut periarfissaat pillugit Naalakkersuisut pilersaarummik ataatsimoortumik suliaqarnissaat siunnersuuteqartumit kissaatigineqarpoq. Innarluutillit pillugit inatsisip ataatsimoortuunnginnera kisiannili suliaasaqarfimmi assigiinngitsuni inatsisiliornikkut inissisimanera siunnersuuteqartup tikkuarpaa.

Ungasinnerusoq eqqarsaatigalugu suliaasaqarfimmi inatsit ataatsimoortoq siunnersuuteqartup kissaatigaa.

Ataatsimiititaliap siunnersuummik suliarinninna

Siunnersuutip akuersissutigineqarnissaa Naalackersuisunit inassutigineqarmat Ataatsimiititaliap maluginiarpaa. Innarluutillit innutaaqataasuniit allanit ajornerusumik inissisimanginnissaat partiit tamarmik isumaqataaffigimmassuk aammattaaq Ataatsimiititaliamit maluginiarneqarpoq. Siunnersuutip inersuarmi siullermeerneqarnerani innarluutillit inuiaqatigiinnut akuutinneqarluinnarlutik ilinniartitaaneq kiisalu sulisartuuneq aqqutigalugit pitsaasumik inuuneqarnissaat naalackersuinikkut partiit tamarmik isumaqataaffingaat aammattaaq Ataatsimiititaliamit maluginiarneqarpoq.

Taamatut isummersornermut Ataatsimiititaliap isumaqataavoq tassami inuiaqatigiit ingerlalluartut tassaammata inuiaqatigiinni kikkugaluartulluuniit assigiimmik akuerineqarnerat inuiaqatigiillu ineriartorneranni kikkut tamarmik peqataanissamut tunniussaqaarnissamullu periarfissinneqarnissaat.

Oqaaseq “innarluutillit” isumalerujussuuvoq innarluutinullu tarnikkut timikkullu assigiinngitsorpasuummut siaruaassimavoq innarluutillillu ilinniagaqaarnissamut periarfissaasa Naalackersuisut pilersaarusernerminni eqqarsaatigissagaat Ataatsimiititaliamit kissaatigineqarpoq. Tassa imaappoq aqqiissutissamik tamatigoorluinnartumik pisariitsumillu nassaassaqaqqangilaq. Aammattaaq innarluutilinnik ilinniartitsinerup innarluutillit ataasiakkaat pisariaqartitaannut; akerlianut pinnani; naleqqussarneqarnissaata erseqqissaatigineqarnissaa pingaaruteqartutut Ataatsimiititaliamit isigineqarpoq.

“Isernissamut periarfissat assigiit” “periarfissat assigiit”-iitulli isumaqaqqangimmat Ataatsimiititaliap taama oqarnermini isumaqarpoq. Ataatsimiititaliap ilinniartitaaneq ima isigaa tamanna unammilligassanik assigiinngitsunik annikitsunik annertuunillu pitsaanerpaamik pissarsiaqaarnissamut peqataasut ingerlatassaannik imaqarluni. Ilinniartitaanermi peqataanissamut kikkut tamanut assigiimmik isernissamut periarfissaqartariaqarput taamaalillunilu anguniagassatut siunniunneqarsimasut angunissaannut periarfissaqarlutik. Taamaattorli ilinniartitsineq ataasiakkaanut immikkullu pisariaqartitsisunut naleqqussarneqaqqangippat ilinniarnarup naammassinissaanut angusinissamullu qanoq ilimanaateqartigisoqarpa.

Naalackersuisut ilisimatitsippot:

” Taamaalilluni Naalackersuisut pingaartippaat innarluutillit sapinngisamik annertunerpaamik nalinginnaasumik inuuneqarnissaminnut ikiorserneqartarnissaat, taamaammallu aamma isumaginninnermut, peqqissutsimut ilinniartitaanermullu Naalackersuisut maanna naapeqatigiittarfeqarput ataatsimoorullugit suliasat oqallisigisarlugit, taakkununga ilanngullugit innarluutilinnut tunngasut”.

Suleqatigiissitap Naalakkersuisoqarfinniit pingasuniit peqataaffigineqartumik pisorta qarfiit akimorlugit ajornartorsiutit pillugit akuttunngitsumik ataatsimeeqatigiittarnerat pitsaasuullunilu pisariaqartuummat Ataatsimiititaliaq isumaqarpoq. Innarluutillit ilinniagaqarnissamut periarfissaat pillugit pilersaarummik suliaqarnermi ataqatigiissaarisooqarnissaa annertuumik pisariaqartinneqarmat taama oqartoqarpoq, taamaalilluni ajornartorsiutaasinnaasut tamarmik qulaajarneqarnissaat qulakkeerneqarsinaaqullugu.

Naggataatigut IPIS tassaasoq innarluutilinnut, qanigisanut, ilinniarsimasunut kiisalu suliffeqarfinnut kalaallisut oqaaseqarfiusunut Kalaallillu Nunaanni innarluutilinni tunngasuni pissutsinut naleqqussagaalluni siunnersuineq Isumaginninnermut Naalakkersuisup pilersissimmagu Ataatsimiititaliap nuannaarutiginninni ersersissavaa.

Inassuteqaat

Siuliani allassimasut siullermeerinninnermilu oqaaseqaatigineqartut tunngavigalugit siunnersuut **akuersissutigineqassasoq Ataatsimiititaliamit isumaqatigiittumit** inassutigineqarpoq.

Taama oqaaseqaateqarluni Ataatsimiititaliap siunnersuut aappassaaniigassanngortippaa.

Harald Bianco

Debora Kleist

Andreas Uldum

Malik Berthelsen

Knud Kristiansen